

Қоидабузарларни видео-расмга олиб юришни касб қилиш жоиз эмас



14:28 / 19.11.2021 1742

Аввал хабар берганимиздек, kun.uz манбасида ҳамда Йўл ҳаракати хавфсизлиги бош бошқармасининг «DIALOG» лойиҳаси кўрсатувида «Шайх Муҳаммад Содиқ Муҳаммад Юсуф» жомеъ масжиди имом ноиби, islom.uz портали раҳбари, «Йўл ҳаракати фикҳи» китоби муаллифи Ҳасанхон Яҳё Абдулмажид билан суҳбат ташкил этилган эди. Йўл ҳаракати қоидаларига амал қилиш мавзусидаги суҳбатлар ижтимоий тармоқларда кенг тарқалди.

Жумладан, ушбу суҳбатларда кўп мунозараларга сабаб бўладиган мавзу — қоидабузарларнинг видеосини тегишли органларга юбориш масаласида имом ноиб Ҳасанхон Яҳё Абдулмажид ўз муносабатини билдириб ўтган. Унга кўра Ислом дини қоидалари бўйича:

«Қоидабузарларнинг видеосини юбориш чақимчилик эмас. Бу жамоатчилик назоратидир. Омманинг ҳақиқага зид иш қилинганда, жамоатчиликнинг вакили сифатида буни беминнат (пул учун эмас) етказиш, иншаллоҳ, жоиз ҳисобланади. Аммо қоидабузарларни видео расмга олиб юборишни ўзига касб қилиш ва бунинг ортидан тирикчилик ҳаракатида бўлиш мумкин эмас. Бу ҳалол касб ҳисобланмайди», дейди йўл ҳаракати фикҳи бўйича мутахассис Ҳасанхон Яҳё Абдулмажид.

Демак, юқоридаги маълумотларга мувофиқ, йўл қоидаларига амал қилиш исломда вожиб амал ҳисобланади.

Шу ўринда ушбу амаллар борасида фазилатли шайх Муҳаммад Содиқ Муҳаммад Юсуф раҳимаҳуллоҳдан иқтибос келтириб ўтсак:

Фарз.

Шариат қилишни жазм ила шубҳасиз ва қатъий далил билан талаб қилган иш фарз ҳисобланади. Фарз амални қилиш лозим ва лобуддир. Уни қилган одам савоб олади. Фарз амални қилмаган одам осий бўлиб, иқобга қолади. Фарзни инкор қилган кофир бўлади.

Вожиб. Шариат қилишни жазм ила аммо қатъий бўлмаган далил билан талаб қилган амал вожибдир. Хусусан, Фитр садақаси, Витр намози ва икки ийд намозлари каби амаллар вожиб амаллардир. Вожиб амални қилиш лозим ва лобуддир. Уни қилган одам савоб олади. Лекин вожибнинг савоби фарзникидан озроқ бўлади. Вожиб амални қилмаган одам осий бўлиб иқобга қолади. Лекин унинг иқоби фарзни қилмаганнинг иқобидан озроқ бўлади. Вожибни инкор қилган кофир бўлмайди. Ҳанафий мазҳабидан бошқа мазҳаблар фарз ва вожибни бир нарса деб тушунадилар ва иккисини қўшиб вожиб деб атайдилар. Аммо ҳанафий мазҳаби юқоридаги дақиқ фарқни эътиборга олиб иккисини алоҳида ҳукмлар деб билади». Иқтибос тугади.

Сизга ҳавола қилинаётган видео манзилда йўл ҳаракати фикҳи бўйича мутахассис Ҳасанхон Яҳё Абдулмажиднинг йўл қоидаларини ўргатиш бўйича «автомобиллар» ва жамиятнинг масъулиятлари, тезликни ошириш оқибатида вафот қилган шахснинг ҳукми, ЙТХ иштирокчилари, гувоҳлар ва масъулларнинг ҳолати, қоидабузарларни расмга олиб, юбориш ҳамда аёллар автомобиль ҳайдашига доир кўплаб қизиқарли мавзулар борасидаги фикрлари билдирилган.

Барча азизларимизга ушбу суҳбат видеоларини кўришни тавсия қиламиз!

<https://youtu.be/8FwomyFbEvE>

<https://youtube.com/watch?v=XwnrbpGvu9g&t=4s>